



Inatsisartunut ilaasortaq, Aqqa Samuelson, Inuit Ataqtigiit

E-mail-ikkut nassiunneqarpoq: inatsisartut@inatsisartut.gl

23-01-2019
Suliap nr.
2019-2158

**Aalisakkerivinnit angerlartitsisarnerit pillugit § 37 naaportorlugu
apeqquteqaammut nr. 2019/019-imut akissut**

Postboks 1601
3900 Nuuk
Tlf. (+299) 34 50 00
E-mail: asn@nanoq.gl
www.naalakkersuisut.gl

Asasara Aqqa Samuelson

Aalisakkerivinnit angerlartitsisarnerit tunngatillugu Inatsisartut suleriaasianni § 37 imm. 1 naaportorlugu Naalakkersuisunut apeqquteqarputit. Apeqqutitit uanga suliaasaqarfinnut innersuunneqarput, matumalu kinguliani akissuteqarfigineqarput.

Akissuteqaammut missingiut Isumaginninnermut Inatsisinillu Atuutsitsinermut Naalakkersuisoqarfimmut, Aningaasaqarnermut Naalakkersuisoqarfimmut kiisalu Aalisarnermut, Piniarnermut Nunalerinermullu Naalakkersuisoqarfimmut oqaaseqarfigisassanngorlugu nassiunneqarsimavoq.

- 1. Ukiuni kingullerni tallimani nuna tamakkerlugu aalisakkanik tunisassiorfiit matoqqatinneqarneranni aalisarnermik inuussutissarsiuteqartut aammalu tunisassiorfimmi sulisut angerlartiinnarneqartarneri qanoq amerlatiginersut kisitsisinnngorlugit Naalakkersuisut paasissutissiisinaappat? Suna pissutigalugu angerlartiinnarneqartarpat?**

Akissut: Aalisarnermik inuussutissarsiuteqartut aamma aalisakkerivinni sulisut qassit aalisakkeriviit matunerisa malitsigisaannik angerlartinneqarsimanersut, Naatsorsueqqissaartarfik imaluunniit kommunit immikkut takussutissiaateqanngillat. Naatsorsueqqissaartarfip taamaallaat inuit angerlartitaanerup malitsigisaannik suliffeerunnermi ikiorsiissutinik tigusaqartartut amerlassusaat nalunaarsorsimavai.

	Suliffeerunnermi ikiorsiissutit nuna tamakkerlugu angerlartitaanermut atatillugu tunniunneqartut	Inuit angerlartitaanermut atatillugu suliffeerunnermi ikiorsiissutinik tunineqartut nuna tamakkerlugu amerlassusaat
2013	7.701.000	740
2014	6.058.000	602
2015	6.526.000	649
2016	4.249.000	575
2017	8.086.000	665

Najoqqutarisaq: Naatsorsueqqissaartarfik

2. Ukiuni kingullerni tallimani tunisassiorfinni sulisut angerlartiinnarnerisigut pisortat ikiorsiissutai eqqarsaatigalugit qanoq annertutigisumik aningaasartuutaasimanerat pillugu Naalakkersuisut paasissutissiisnaappat?

Akissut: Takuuk akissut 1. Kommunit paasissutissaataat malillugit, sulisunut angerlartinneqartunut pisortanit ikiorsiissutinik tunniussisarneq qaqutigoorpoq. Aalisakkerivinnit angerlartitsinerit malitsigisaannik pisortanit ikiorsiissutinik tunniussisarnerup annertussusaa pillugu paasissutissanik pissarsiarineqarsinnaasunik soqanngilaq.

3. Nuna tamakkerlugu aalisakkanik tunisassiorfiit matoqqatinneqarnerisa nalaanni aalisarnermik inuussutissarsiteqartut tunisassiorfimmilu sulisut angerlartiinnannginnissaat unittuunnginnissaallu qulakkeerniarlugu Naalakkersuisut periusissiaqarpat?

Akissut: Aalisakkeriviit matunerisa malitsigisaanik angerlartitsinerit amerlanersai ullualuinnarnik sivisussuseqartarput, kisianni angerlartitsineq sapaatit akunneri marluk sinnerlugit sivisussuseqarsimatillugu, angerlartinneqartut ataasiakkaat ataasiakkaanut iliuusissanut pilersaarummik suliaritsinissamut pisinnaatitaaffeqarput. Tamatuma saniatigut piginnaasaqalersitsisunik pikkorissaanernik ingerlatsinissaq pillugu Naalakkersuisut inuussutissarsitunut ilinniarfinnik, inuussutissarsiorunik aamma Majoriaq-mik oqaloqateqarput. Taakkua ilaatigut piffissani

pisariaqartitsinerup annertunerpaaffiini ingerlanneqartarput.


**4. Siunissami Nunatsinni tunisassiorfinni sulisut
angerlartiinnartannginnissaat qulakkeerniarlugu Naalackersuisut
qanoq suliniuteqarniarpat?**

Akissut: Naalackersuisut aalisakkerinermut suliffeqarfimmik ingerlataqanngillat, kisianni suliffeqarfiit pilersitsiviulluartumik oqaloqatiginissaat ammaffiguannarlugu. Tamatuma saniatigut suliassaqarfiit akimorlugit suleqatigiissitaliamik, suliffissaqartitsinerup qanoq iliorluni annertusitinnissaanut inassuteqaateqartussamik, Naalackersuisut pilersitsipput. Naalackersuisut ilaatigut tamanna tunngavigalugu suliffeqarnermi illuatungeriit oqaloqatigalugit suliffissaqartitsiniarnermut periusissiamik nutaamik suliaqassapput. Ilanngulluguttaaq aalisakkerivinnik suliffeqarfissuit immineq nioqqutissiornermik ingerlaavarnera tulaassuinerlu pitsanngorsarpaat, taamaaliornermi angerlartitsisarnerit ikilisarlugit, soorluttaaq maanna sulisussarsiornermut, sulisullu pigiinnarnissaanut atatillugu annertuumik suliaqartoqarpoq suliffiit sulisullu isertitaqarnerannut iluaqtaasumik.

**5. Siunissami Nunatsinni tunisassiorfiit pissuteqarlutik
matoqqatinneqarnerisa nalaanni aalisarnermik
inuussutissarsiuuteqartut aalaakkaasumik
inuussutissarsiorsinnaanissaat qulakkeerniarlugu Naalackersuisut
qanoq pilersaaruteqarpat?**

Akissut: Takuuk akissut 3. Tamatuma saniatigut suliassaqarfiit akimorlugit suleqatigiissitaliamik, suliffissaqartitsinerup qanoq iliorluni annertusitinnissaanut inassuteqaateqartussamik, Naalackersuisut pilersitsipput. Naalackersuisut ilaatigut tamanna tunngavigalugu suliffeqarnermi illuatungeriit oqaloqatigalugit suliffissaqartitsiniarnermut periusissiamik nutaamik suliaqassapput.

Inussiarnersumik inuulluaqqusillunga



Erik Jensen

Aatsitassanut Suliffeqarnermullu Naalackersuisoq